

“Ewch, gan hynny, a gwnewch ddisgyblion o’r holl genhedloedd, gan eu bedyddio hwy yn enw’r Tad a’r Mab a’r Ysbryd Glân.”

**(Mathew 28:19)**

Dyma gomisiwn mawr yr Arglwydd Iesu i’w apostolion ac i ninnau i wneud disgyblion trwy’r holl ddaear. Dyma’n sail a’n hawdurdod dros gyhoeddi’r Efengyl i bawb trwy’r byd.

### Awdurdod mawr

Mae Iesu’n honni yn adnod 17 fod ganddo bob gallu, a’r hawl i weithredu’r pŵer yna. Mae’n debyg i’w honiad yn 11.27 lle mae’n dweud: “**Traddodwyd i mi bob peth gan fy Nhad.**” Oes gwahaniaeth yn ei honiad ar ôl yr atgyfodiad? Onid oedd gan Iesu yn nyddiau ei gnawd awdurdod dros afiechyd, cythreuliaid, byd natur, pobl a marwolaeth hyd yn oed? Eto, fel welwn rhyw gyfyngu ar ehangder ei awdurdod. Dywedodd wrth bobl yn aml i beidio â dweud wrth neb am y wyrth oedd wedi digwydd iddynt. Cododd dri pherson o’r marw, a chodwyd rhai saint o’u beddi pan fu farw ar y groes.

Nawr mae’n honni mwy, sef yr hawl i weithredu grym di-ben-draw dros nef a daear; sofraniaeth byd-eang heb unrhyw gyfyngiadau a fydd yn cyrraedd ei phenllanw yn niwedd yr oes, pan fydd yn atgyfodi’r *holl* feirw ac yn barnu *pob* person.

Dyma mae wedi ei dderbyn gan y Tad fel Cyfryngwr atgyfodedig; dyma’r llawenydd oedd o flaen ei lygaid wrth iddo ddiodeff; dyma’i wobwr am ei waith gorffenedig a’r iawn a dalodd ar y groes.

### Comisiwn mawr

Ar sail yr awdurdod sydd ganddo, mae’n anfon ei apostolion. Dywedodd wrth ei ddisgyblion ynghynt i beidio â mynd at y Cenhedloedd. Nid nad oedd hyn yn fwiad gan Dduw o’r cychwyn, ond y cynllun dwyfol oedd i’r Efengyl fynd o Jerwsalem. Trefn Duw yw: “**yr Iddewon yn gyntaf a hefyd y Groegiaid**” (Rhuf. 1:16).

Doedd dim disgwyl i bawb ddod atyn nhw, ond roedd cyfrifoldeb arnynt i fynd allan. Mae Iesu wedi eu paratoi a’u trwytho ond nawr mae’n eu hanfon allan gyda phob cefnogaeth: “**Fel eryr yn cyffroi ei nyth ac yn hofran uwch ei gywion, lledai ei adenydd a’u cymryd ato, a’u cludo ar ei esgyll**” (Deut. 32:11).

Eu nod oedd gwneud disgyblion. Er fod hyn yn golygu disgwyl troedigaeth person, mae’n golygu mwy hefyd. Rhaid deall a derbyn y gwirionedd yng Nghrist,

rhaid credu ynddo ac aros ynddo. Rhaid bod parodrwydd i'w ddilyn ar unwaith, ble bynnag mae'n arwain.

Wrth wneud disgyblion, roedd gwaith deublyg gan yr apostolion:

### ***Bedyddio***

Mae bod yn barod am fedydd yn golygu profi edifeirwch a derbyn Gair Duw. Rhaid bedyddio i enw Duw; yn Dad, Mab ac Ysbryd Glân. Sylwer mai un 'enw' yw hwn. Mae bedyddio i'r enw hwn yn dweud wrthym bod y bedydd yn symbol o gymod a pherthynas newydd rhwng Duw a dyn trwy Iesu Grist.

### ***Dysgu***

Roedd Iesu'n disgwyl i'w apostolion ddysgu holl orchmynion Crist i'w bobl. Golygai hyn ei sgysiau, ei ddamhegion, ei broffwydoliaethau a'i addewidion hyfryd. Golygai adrodd a chyflwyno'i ddywediadau gwerthfawr a'i anogaethau unigryw. Roedd wedi dysgu ynglŷn â chodi'r groes a charu gelyn. Roedd wedi rhybuddio ynglŷn ag adnabod gau-broffwydi a rhagrithwyr. Roedd hanes ei fywyd a'i weinidogaeth yn llawn dysgeidiaeth bwysig i Eglwys y dyfodol.

### **Addewid mawr**

Yna mae'r Bugail mawr yn cysuro ac yn cadarnhau ei braidd bychan trwy addo bod gyda nhw tan y diwedd. Nid addewid wag mo hon chwaith, ond ffaith a gwirionedd safadwy.

Dywedodd Jehofa, sef 'Ydwyf,' y byddai gyda Moses wrth iddo wynebu Pharo. Nawr mae Iesu'n dweud 'yr wyf fi' nid 'fe fyddaf fi' i ddangos ei bresenoldeb parhaus trwy ei Ysbryd gyda'r apostolion.

Mae'n addo bod gyda nhw ac nid yn eu herbyn. Pan wynebodd Iesu Saul ar y ffordd i Ddamascus dywedodd; **"Pam yr wyt yn fy erlid i?"** (Act. 9:4). Erlid y saint oedd Saul, ond roedd Iesu yn ei uniaethu ei hun yn llwyr gyda'i Eglwys am ei fod gyda hi bob amser.

Mae'r thema o bresenoldeb cysurlon Crist gyda ni wedi dod ar ddechrau, canol a diwedd efengyl Mathew:

**"Wele, bydd y wyryf yn beichiogi, ac yn esgor ar fab, a gelwir ef Immanuel, hynny yw, o'i gyfieithu, 'Y mae Duw gyda ni'".** (1.23)

**"Oherwydd lle y mae dau neu dri wedi dod ynghyd yn fy enw i, yr wyf yno yn eu canol"** (18.20).

**"Ac yn awr, yr wyf fi gyda chwi yn wastad hyd ddiwedd amser"** (28.20).

Mae'n comisiwn i efengyleiddio'r byd yn seiliedig ar awdurdod Brenin brenhinoedd, gyda'r addewid o bresenoldeb yr Arglwydd gyda ni tan ddiwedd yr oes. Weithiau, mae'n anodd ei weld, ond, fel yr haul mewn niwl neu hindda, mae yno o hyd.